

derbarlich betrogen hat/aber doch endlich von dem König Agramante ist auffgehengt worden.

Solche Gefellen aber wagen es darauff/ vnd leben vnter dessen nicht allein in Frewde/ sondern triumphiren auch gleichsamb/ fressen vnd sauffen so lang als sie können/ biß endlich der Hals alles auff einmahl bezahlen muß. Vnd wie Harpalus ein berühmter Dieb/ dessen Cicero libr. 2. de natura Deorum auch gedenecket/ der Götter spottet/ daß sie ihn so lang leben liessen/ da er doch alle Tag stahle/ also machen es diese auch vnd spotten beydes Gottes/ daß er ihnen so lang zusihet/ vnd der Welt/ daß sie ihnen nicht wol kan beykomme. Halten sich auch selber/ wie droben gemeldet/ für glückselige Leute/ die alles voll auff haben/ vnd greiffen zu/ wo es sie gelüftet: Vnd trus dem/ der sie antasten/ oder bezüchtigen dörfte. Da darff niemand mucken/ vnd ist nunmehr besser stehlen/ als einen eines Diebstahls bezüchtigen: Die Obern bieten ihnen offtermals die Handt/ der Richter muß sich selbst fürchten/ als welcher auch auff seiner seiten nit so gar rein/ vnd nichts darnach fraget/ dz arme vnd einfältige Leut/ welche ihr Wort nicht gnugsamb können vorbringen/ verfortheilet/ vntergetrucket/ oder zum wenigsten außgesogen werden: die Regenten ligen offtermals mit ihnen vnter der Decken/ da sie die Vnterthanen vber die Maß beschweren/ das gemeine Einkommen schwächen/ das Landt wird mit Schulden beladen/ vnd fällt ein Stuck nach dem andern vnter frembde Hände/ vnd eilet in Summa alles mit einander nach seiner letzten Dehlung: wird alles gewendet auff Pracht vnd Hoffart/ auff Wollust/ Huren/ Buben/ Pferdt/ Hunde/ Schaleksnarren vnd was dergleichen Verderbung mehr seyn mag/ da vnter dessen der arme gemeine Man die Haar muß dargeben; vnd dieses seynd die

grosse Landtdiebe/ die billich die kleine Stätt/ vnd Marcktdiebe straffen solten; seynd aber eben so sicher/ als jene. Solte aber solches in die lenge wären? Solte dieses Vntraut also fortwachsen? Solte das helle vnd alles sehende Aug/ nicht einmal auffwachen? Solten solche Buben vngestraft bleiben? Solten nit alle Stände dermal eins ein abschewlich Exempel der Göttlichen Raach an ihnen sehen? **G D E** der alles siehet/ der alles weiß/ alles durch seine vnforschliche Providenz regiert/ wird endlich/ nach dem er lang genug zusehen/ mit schwerer Hand vnd in seinem Zorn alle Diebe / sie haben gleich Namen wie sie wollen/ beydes zeitlich vnd ewiglich straffen/ nach seinem Wort/ welches nicht fehlen/ liegen oder betriegen kan/ welches halt ich/ gnugsamb von der Diebszunfft wird gesagt seyn.

### A N N O T A T I O.

Von Dieben mag man bey Petro Victorio in seinen Variis lectionibus fol. 119. vnd 285. Desgleichen bey Petro Crinito lib. 3. de honesta disciplina cap. 13. Item bey Cal. agino fol. 612. vnd 297. Item bey Rhodigino lib. 9. cap. 6. vnd lib. 10. ca. 2. nachsuchen.

Hundert vnd Fünffzehenter Discurs.

### Von Zinshebern vnd Rentzmeistern.

**I**n dem Ursprung des Lateinischen Namens Quæstor, welchen die Venediger Il Camerlengo nennen/ gibt Marcus Varro eine klärliche Nachricht vnd vermeinet/ er komme her von Quærendo; sintemal ihr Ampt bey den alten Römern